

## МОНГОЛ УЛСЫН ХУУЛЬ

2020 он ... дугаар  
сарын ...-ны өдөр

Улаанбаатар  
хот

### КОРОНАВИРУСТ ХАЛДВАР /COVID-19/-ЫН ЦАР ТАХЛААС УРЬДЧИЛАН СЭРГИЙЛЭХ, ТЭМЦЭХ ТУХАЙ

#### НЭГДҮГЭЭР БҮЛЭГ НИЙТЛЭГ ҮНДЭСЛЭЛ

##### 1 дүгээр зүйл.Хуулийн зорилт

1.1.Энэ хуулийн зорилт нь өндөржүүлсэн болон бүх нийтийн бэлэн байдлын зэрэгт шилжүүлсэн хугацаанд коронавируст халдвар /COVID-19/ /цаашид “Цар тахал” гэх/-аас урьдчилан сэргийлэх, нийгмийн эрүүл мэндийг хамгаалах, иргэний эрхэд тодорхой хязгаарлалт хийх, холбогдох шийдвэрийг шуурхай гаргах, зохион байгуулалтын асуудлыг Засгийн газар онцгой журмаар шийдвэрлэхтэй холбогдсон харилцааг зохицуулахад оршино.

##### 2 дугаар зүйл.Коронавируст халдвар /COVID-19/-ын цар тахлаас урьдчилан сэргийлэх, тэмцэх хууль тогтоомж

2.1.Коронавируст халдвар /COVID-19/-ын цар тахлаас урьдчилан сэргийлэх, тэмцэх хууль тогтоомж нь Монгол Улсын Үндсэн хууль<sup>1</sup>, Гамшгаас хамгаалах тухай хууль<sup>2</sup>, Эрүүл мэндийн тухай хууль<sup>3</sup>, энэ хууль болон эдгээр хуультай нийцүүлэн гаргасан хууль тогтоомжийн бусад актаас бүрдэнэ.

2.2.Монгол Улсын олон улсын гэрээнд энэ хуульд зааснаас өөрөөр заасан бол олон улсын гэрээний заалтыг дагаж мөрдөнө.

##### 3 дугаар зүйл.Хуулийн үйлчлэх хүрээ, хугацаа

3.1.Цар тахлаас урьдчилан сэргийлэх, тэмцэх үйл ажиллагааг энэ хуулиар зохицуулах бөгөөд энэ хуульд зохицуулснаас бусад харилцааг холбогдох хуулиар зохицуулна.

3.2.Энэ хууль нь Дэлхийн эрүүл мэндийн байгууллагаас тогтоосон зөвлөмжийн дагуу цар тахлаас урьдчилан сэргийлэх, тэмцэх зорилгоор өндөржүүлсэн болон бүх нийтийн бэлэн байдлын зэрэгт шилжүүлсэн хугацаанд үйлчилнэ.

<sup>1</sup> Монгол Улсын Үндсэн хууль “Төрийн мэдээлэл” эмхэтгэлийн 1992 оны 01 дугаарт нийтлэгдсэн.

<sup>2</sup> Гамшгаас хамгаалах тухай хууль “Хууль тогтоомжийн” эмхэтгэлийн 2017 оны 07 дугаарт нийтлэгдсэн.

<sup>3</sup> Эрүүл мэндийн тухай хууль “Төрийн мэдээлэл” эмхэтгэлийн 2011 оны 21 дугаарт нийтлэгдсэн.

3.3.Монгол Улсын Их Хурлын сонгуулийн тухай хуулиас<sup>4</sup> бусад хуулийн дагуу олон нийтийг хамарсан үйл ажиллагаа зохион байгуулах, албан тушаалтныг сонгон шалгаруулахаар хуульчилсан зохицуулалтыг энэ хуулийн үйлчлэл зогссон өдрөөс эхлэн тухайн хуульд заасан хугацааг баримтлан хэрэгжүүлнэ.

#### **4 дүгээр зүйл.Хуулийн нэр томъёоны тодорхойлолт**

4.1.Энэ хуульд хэрэглэсэн дараах нэр томъёог доор дурдсан утгаар ойлгоно:

4.1.1.“шинэ болон сэргэн тархаж буй халдварт өвчин” гэж хүн амын дунд шинээр илэрсэн, эсхүл өвчлөлийн тохиолдол, газар нутгийн хамралтын хувьд эрс нэмэгдэж байгаа халдварт өвчнийг;

4.1.2.“тохиолдол” гэж тухайн өвчний батлагдсан болон сэжигтэй, магадлалтай тохиолдол бүрийг;

4.1.3.“халдвар” гэж хүн амын эрүүл мэндэд аюул учруулж болох халдвар үүсгэгч хүн болон амьтны биед нэвтрэн орох, өсөх, үржихийг;

4.1.4.“хөл хорио” гэж тодорхой хугацаанд хүн ам, газар нутгийг хамарч халдварт өвчин тархахаас сэргийлэх, халдварыг анх гарсан голомтод нь барих, хяналтад авахад чиглэсэн арга хэмжээг;

4.1.5.“тусгаарлах” гэж халдвар авсан байж болзошгүй сэжигтэй хүмүүс, эсвэл халдвараар бохирлогдсон сэжигтэй гар тээш, чингэлэг, тээврийн хэрэгсэл, барааг тусгаарлахыг;

4.1.6.“ажиглах” гэж халдвар дамжих аюулыг тодорхойлох зорилгоор тодорхой хугацааны туршид иргэний эрүүл мэндийн байдлыг хянах үйл ажиллагааг;

4.1.7.“халдварлагдсан” гэж хүн амын эрүүл мэндэд эрсдэл учруулах халдвар тээгч хүн болон халдвараас нас барсан хүний цогцос, халдвар үүсгэгчээр бохирдсон эд хэрэглэл, гар тээш, ачаа, чингэлэг, тээврийн хэрэгсэл, бараа, шуудангийн илгээмжийг;

4.1.8.“бохирдол” гэж амьтай болон амьгүй биет зүйлсийн гадаргуу дээр эсвэл аливаа хэрэглээний бүтээгдэхүүний гадна болон дотор хүн амын эрүүл мэндэд аюул учруулж болзошгүй халдвартай буюу хоруу чанартай бодис, материал байхыг;

4.1.9.“халдваргүйжүүлэлт” гэж хүний эсхүл амьтны биеийн гадаргуу дээр, эсхүл гар тээш, ачаа тээш, чингэлэг, тээврийн хэрэгсэл, бараа, шуудангийн илгээмжийн дотор болон гадна хэсэгт байгаа халдварын эх уурхайг устгах, арилгах зорилгоор хими, физикийн аргаар арга хэмжээ авахыг;

4.1.10.“эрсдэлийн түвшин” гэж аюулд өртөх магадлал, өртсөн тохиолдолд гарч болох үр дагаврын “бага”, “дунд”, “өндөр”, “маш өндөр” гэсэн зэрэглэлийг.

#### **5 дугаар зүйл.Үйл ажиллагаанд баримтлах зарчим**

5.1.Цар тахлаас урьдчилан сэргийлэх, тэмцэх үйл ажиллагаанд дараах зарчим баримтална:

---

<sup>4</sup> Монгол Улсын Их Хурлын сонгуулийн тухай хууль “Төрийн мэдээлэл” эмхэтгэлийн 2019 оны 49 дугаарт нийтлэгдсэн.

5.1.1.хүний амь нас, эрүүл мэнд, аюулгүй байдлыг хамгаалах, эмнэлгийн үйлчилгээ тэгш хүртээмжтэй байх;

5.1.2.шуурхай, ил тод, хариуцлагатай байх;

5.1.3.олон улсын эрүүл мэндийн дүрмийн хүрээнд үйл ажиллагаагаа хэрэгжүүлэх;

5.1.4.бүх нийтийн эрүүл мэндийг хамгаалах зорилгоор бусад хуульд зааснаас өөр журам тогтоох, хүний зарим эрх, эрх чөлөөг хязгаарлах;

5.1.5.ялгаварлан гадуурхахгүй, гутаан доромжлохгүй байх;

5.1.6.байгууллага хоорондын хамтын ажиллагааг хангах, харилцан мэдээлэл солилцох, иргэд, олон нийтийн оролцоо, дэмжлэгийг авч ажиллах.

## **ХОЁРДУГААР БҮЛЭГ ТӨРИЙН БАЙГУУЛЛАГЫН АВЧ ХЭРЭГЖҮҮЛЭХ АРГА ХЭМЖЭЭ**

### **6 дугаар зүйл.Монгол Улсын Их Хурлын бүрэн эрх**

6.1.Монгол Улсын Их Хурал цар тахлаас урьдчилан сэргийлэх, хамгаалах асуудлаар дараах бүрэн эрхийг хэрэгжүүлнэ:

6.1.1.цар тахлын үед шуурхай авч хэрэгжүүлэх арга хэмжээтэй холбогдсон хууль, Улсын Их Хурлын бусад шийдвэрийн төслийг дараалал харгалзахгүйгээр хэлэлцэн шийдвэрлэх;

6.1.2.энэ хуулийн 6.1.1-д заасан хууль, Улсын Их Хурлын бусад шийдвэрийн төслийг Монгол Улсын Их Хурлын чуулганы хуралдааны дэгийн<sup>5</sup> тухай хуульд заасны дагуу цахимаар болон хялбаршуулсан журмаар, шуурхай хянан хэлэлцэх;

6.1.3.цар тахлын эсрэг Засгийн газраас авч хэрэгжүүлж байгаа арга хэмжээнд тогтмол хяналт тавих;

6.1.4.энэ хуулийн биелэлтийн талаар сар тутам хэлэлцэх.

### **7 дугаар зүйл.Цар тахлаас урьдчилан сэргийлэх, тэмцэх талаар Засгийн газраас авч хэрэгжүүлэх арга хэмжээ**

7.1.Цар тахлаас урьдчилан сэргийлэх, тэмцэх асуудлаар Засгийн газар энэ хуулийн 11.1-д заасан шаардлагад нийцүүлэн дараах арга хэмжээг авч хэрэгжүүлнэ:

7.1.1.цар тахлаас урьдчилан сэргийлэх, тэмцэх чиглэлээр хорио цээр, хөдөлгөөний болон цагийн хязгаарлалт тогтоох зэрэг шаардлагатай арга хэмжээг авч, тэдгээрт мөрдөх дэглэм, журам, зааврыг батлах;

7.1.2.цар тахлын үед иргэдийн эрүүл мэнд, орлогыг хамгаалах, ажлын байрыг хадгалах, эдийн засгийг идэвхжүүлэх, эрүүл мэндийн тусламж, үйлчилгээ

---

<sup>5</sup>Улсын Их Хурлын чуулганы хуралдааны дэгийн тухай хууль "Төрийн мэдээлэл" эмхэтгэлийн 2007 оны 39 дугаарт нийтлэгдсэн.

үзүүлэх, хорио цээрийн болон хязгаарлалтын дэглэмд шаардлагатай санхүүжилтийг шийдвэрлэх зорилгоор жилийн батлагдсан төсвийн нийт зарлагын хэмжээг нэмэгдүүлэхгүйгээр төсвийн ерөнхийлөн захирагч хооронд, хөрөнгийн болон урсгал зардал хооронд төсвийн зохицуулалт хийх;

7.1.3. цар тахлын голомтод үүрэг гүйцэтгэж байгаа төрийн албан хаагчдад моргейжийн нэн хөнгөлөлттэй зээл олгох замаар нийгмийн баталгааг хангах тусгай төлөвлөгөөг баталж, санхүүжүүлэх эх үүсвэрийг тодорхойлж, хэрэгжүүлэх;

7.1.4. цар тахлын үед голомт болон эрсдэл бүхий нөхцөлд ажиллах байгууллага, ажилтныг шаардлагатай хамгаалалтын хувцас, хэрэгсэл, техник, багаж, тоног төхөөрөмжөөр хангах, мэдээлэл, сургалт, сэтгэл зүйн туслалцаа болон бусад дэмжлэг үзүүлэх, хөдөлмөрийн эрүүл, аюулгүй байдлын нөхцөл бүрдүүлэх, эдгээртэй холбоотой зардлыг шийдвэрлэх;

7.1.5. цар тахлын үед хорио цээр, хязгаарлалтын дэглэмийн улмаас үйл ажиллагаа нь доголдсон аж ахуйн нэгж, байгууллага, цалин, орлого нь тасалдсан иргэдийн талаар авах арга хэмжээний саналыг шийдвэрлэх;

7.1.6. цар тахлаас урьдчилан сэргийлэх, тэмцэх чиглэлээр ажиллаж байгаа байгууллага хоорондын хамтын ажиллагааг хангах, харилцан мэдээлэл солилцох, тус үйл ажиллагаанд төрийн бусад байгууллагыг татан оролцуулах журмыг Улсын онцгой комиссын санал болгосноор батлах;

7.1.7. нийтээр тэмдэглэх баярын болон тэмдэглэлт өдрийг тэмдэглэн өнгөрүүлэхийг улсын хэмжээнд болон зарим нутаг дэвсгэрийн хэмжээнд хязгаарлах;

7.1.8. өмчийн хэлбэр үл харгалзан бүх шатны боловсрол, сургалтын үйл ажиллагааг тодорхой хугацаагаар хойшлуулах;

7.1.9. ерөнхий боловсролын сургуулийн үйл ажиллагааг тодорхой хугацаагаар хойшлуулсан, хязгаарласан тохиолдолд онлайн эсхүл бусад хэлбэрээр зайн сургалтыг чанартай, хүртээмжтэй хүргэх, багш болон суралцагчдын оролцоо, түүнд тавих хяналтыг сайжруулах;

7.1.10. шашны байгууллагын шашин номын хурал, цуглааныг олон нийтийг хамруулан зохион байгуулахыг тодорхой хугацаагаар зогсоох;

7.1.11. цар тахлаас урьдчилан сэргийлэх, тэмцэх, эрүүл мэндээ хамгаалах арга замын талаар үнэн зөв, бодит мэдээллээр иргэдийг тогтмол, шуурхай, хүртээмжтэй хангах;

7.1.12. цар тахлын үед орон гэргүй, нэн ядуу иргэнийг орон байр, хоол хүнс, ундны цэвэр усаар хангах, халдвараас сэргийлэх ажлыг зохион байгуулах;

7.1.13. баривчлах, цагдан хорих байр, хорих ангид байгаа болон бусад хэлбэрээр эрх чөлөө нь хязгаарлагдсан иргэдийн эрүүл мэндийг хамгаалах, халдвараас урьдчилан сэргийлэх, эрүүл мэндийн тусламж, үйлчилгээ, эм, эмнэлгийн хэрэгслээр хангах ажлыг зохион байгуулах;

7.1.14.эмнэлгийн хэрэгсэл, эм, оношлуур, урвалж, ариутгалын бодис, иргэдийн хамгаалах хэрэгсэл, хүнсний болон бусад шаардлагатай барааг улсын хилээр оруулах, гаргахыг хориглох асуудлыг шийдвэрлэх;

7.1.15.болзошгүй гамшиг, нийгмийн эрүүл мэндийн ноцтой байдлын үед бэлэн байдлыг хангах, хариу арга хэмжээ авах шаардлагатай нөөцтэй байх ба нөөц бүрдүүлэхтэй холбоотой зардлыг шийдвэрлэх;

7.1.16.цар тахлаас урьдчилан сэргийлэх, тэмцэх үйл ажиллагаанд ажлын тусгай горимоор томилогдон ажиллаж байгаа төрийн албан хаагчдад нэмэгдэл, урамшуулал олгох асуудлыг шийдвэрлэх;

7.1.17.цар тахлаас урьдчилан сэргийлэх, тэмцэх үйл ажиллагаанд иргэн, аж ахуйн нэгж, байгууллагыг татан оролцуулж болох ба татан оролцуулах, ажлын хөлс, нэмэгдэл, нөхөн олговор олгох журмыг батлах;

7.1.18.өндөржүүлсэн болон бүх нийтийн бэлэн байдлын зэрэгт шилжүүлсэн хугацаанд өргөн хэрэглээний болон стратегийн ач холбогдол бүхий зарим бараа бүтээгдэхүүний үнийн зохицуулалт буюу бараа бүтээгдэхүүний үнийг нэг хэмжээнд барихад чиглэсэн арга хэмжээ авах;

7.1.19.улсынхаа нутаг дэвсгэрт болон гадаадад зорчих иргэний үндсэн эрхийг тодорхой хугацаагаар хязгаарлах;

7.1.20.гэр бүлийн хүчирхийллээс урьдчилан сэргийлэх ажлыг эрчимжүүлэх, хохирогчид үзүүлэх үйлчилгээ, түр хамгаалах байранд шаардлагатай хөрөнгө оруулалт болон 24 цагаар ажиллуулах утасны санхүүжилтийг бүрэн шийдвэрлэх;

7.1.21.цар тахлаар өвчилсөн, өвчилсөн байж болзошгүй хүнийг ялгаварлан гадуурхах, гутаан доромжлохоос урьдчилан сэргийлэх, хуульд заасан аргаар таслан зогсоох;

7.1.22.арга хэмжээ авахдаа өндөр настай, хууч өвчтэй, эрүүл мэндийн тогтмол тусламж, үйлчилгээ шаардлагатай, хөгжлийн бэрхшээлтэй, жирэмсэн, эмзэг бүлэгт үзүүлэх сөрөг нөлөөллийг бууруулах;

7.1.23.эрүүл мэндийн тусламж, үйлчилгээ, эм, хэрэгслээр иргэдийг тэгш, хүртээмжтэй хангах.

7.2.Энэ хуулийн 7.1-д заасан арга хэмжээг Засгийн газраас авч хэрэгжүүлэхэд Төсвийн тухай<sup>6</sup> болон Төсвийн тогтвортой байдлын тухай хуульд<sup>7</sup> заасан төсвийн тусгай зарчим, төсвийн төсөл боловсруулах, тухайн жилийн төсвийн тухай хуульд нэмэлт, өөрчлөлт оруулах үндэслэл хамаарахгүй.

## **8 дугаар зүйл.Цар тахлаас урьдчилан сэргийлэх, тэмцэх талаар Улсын онцгой комиссоос авч хэрэгжүүлэх арга хэмжээ**

<sup>6</sup> Төсвийн тухай хууль "Төрийн мэдээлэл" эмхэтгэлийн 2012 оны 03 дугаарт нийтлэгдсэн.

<sup>7</sup> Төсвийн тогтвортой байдлын тухай хууль "Төрийн мэдээлэл" эмхэтгэлийн 2010 оны 30 дугаарт нийтлэгдсэн.

8.1.Цар тахлаас урьдчилан сэргийлэх, тэмцэх асуудлаар Улсын онцгой комисс дараах арга хэмжээг авч хэрэгжүүлнэ:

8.1.1.гадаад улсад байгаа Монгол Улсын иргэн буцаж ирэх хүсэлт гаргасан тохиолдолд тухайн улс дахь өвчлөлийн тархалт, эрсдэл, холбогдох шинжилгээ хийлгэсэн эсэх, шууд нислэгийн боломж зэрэг бусад нөхцөл байдлыг харгалзан татан авах ажлыг үе шаттайгаар зохион байгуулах;

8.1.2.энэ хуулийн 8.1.1-д заасан ажиллагааны хүрээнд ирсэн зорчигчийг хилээр нэвтрүүлэх зөвшөөрөл олгох нэгдсэн журмыг баталж, нэвтрэх зөвшөөрөл олгох асуудлыг тухай бүр шийдвэрлэх;

8.1.3.транзит болон улс хоорондын ачаа тээвэр, эрдэс баялгийн экспортын хүрээнд хилийн боомтоор нэвтрүүлэх ачаа тээврийг хилээр нэвтрүүлэх зөвшөөрөл олгох нэгдсэн журмыг батлах;

8.1.4.энэ хуулийн 7.1.15-д заасан нөөц бүрдүүлэх, хуваарилах ажлыг зохион байгуулах.

## **9 дүгээр зүйл.Цар тахлаас урьдчилан сэргийлэх, тэмцэх талаар төрийн бусад байгууллагын үйл ажиллагаа**

9.1.Цар тахлын тохиолдол ажиглах, илрүүлэх, оношлох, баталгаажуулах, мэдээлэх, халдварт өвчтөнийг тусгаарлах, эмчлэх зэрэг шаардлагатай бусад хариу арга хэмжээний журмыг эрүүл мэндийн асуудал эрхэлсэн Засгийн газрын гишүүн батална.

9.2.Цар тахлын тохиолдол тандах, өвчний сэжигтэй шинж тэмдэг илэрсэн болон халдварт өвчтөнтэй харьцагч, халдварт өвчлөл гарсан бүс нутгаар дамжин ирэгчийг тусгаарлах, ажиглах, хөл хорио тогтоох, халдварлагдсан болон бохирдолт бүхий, бохирдолт байж болзошгүй аливаа гадаргуу, эд зүйлийг ариутгах, халдваргүйжүүлэх зэрэг шаардлагатай бусад хариу арга хэмжээний журмыг мэргэжлийн хяналтын асуудал эрхэлсэн Засгийн газрын гишүүн батална.

9.3.Энэ хуулийн 7.1.15-д заасан нөөцөд байх эм, эмнэлгийн хэрэгсэл, эмнэлгийн тоног төхөөрөмж, ариутгал, халдваргүйтгэлийн бодисын жагсаалт, нөөц бүрдүүлэх, хадгалах, шинэчлэх, зарцуулах зааврыг эрүүл мэндийн болон онцгой байдлын асуудал эрхэлсэн Засгийн газрын гишүүд хамтран батална.

9.4.Халдварт өвчнөөс хамгаалах зориулалттай, эмнэлгийн хэрэгслийг эрүүл ахуйн шаардлага хангасан эсэхийг тодорхойлсон лабораторийн шинжилгээг үндэслэн эмнэлгийн хэрэгслийн тусгай зөвшөөрөл шаардалгүйгээр хилээр оруулах ба тус хамгаалах хэрэгслийн жагсаалтыг эрүүл мэндийн асуудал эрхэлсэн Засгийн газрын гишүүн батална.

9.5.Цар тахлыг эмчлэх шинэ төрлийн эмийн бүртгэлийг эрүүл мэндийн асуудал эрхэлсэн төрийн захиргааны төв байгууллага нь хялбаршуулсан журмаар шийдвэрлэнэ.

9.6.Шинэ болон сэргэн тархаж буй халдварт өвчний аюулыг тодорхойлж, халдварт өртөх магадлалыг тооцон өртсөн тохиолдолд гарч болох үр дагаврыг тооцох эрсдэлийн үнэлгээг эрүүл мэндийн асуудал эрхэлсэн төрийн захиргааны төв

байгууллага нь онцгой байдлын асуудал эрхэлсэн төрийн захиргааны байгууллагатай хамтран хийж, эрсдэлийн түвшинг тогтооно.

9.7.Энэ хуулийн 7.1.15-д заасан нөөц бүрдүүлэх зорилгоор бараа бүтээгдэхүүнийг импортлох, дотооддоо үйлдвэрлэхэд шаардагдах түүхий эд, тоног төхөөрөмжийг гаалийн болон нэмэгдсэн өртгийн албан татвараас чөлөөлнө.

9.8.Цар тахлаар халдварлагдсан болон өвчний сэжигтэй шинж тэмдэг бүхий гадаадын иргэн, харьяалалгүй иргэнийг Монгол Улсын хилээр оруулахыг хориглоно.

9.9.Зорчигч, тээврийн хэрэгслийг хорио цээрийн дэглэмийн дор улсын хил нэвтрүүлэхэд хилийн хяналтын байгууллагаас гадна холбогдох эрх бүхий байгууллагын төлөөлөл хилийн боомтод ажиллаж болох ба тус үйл ажиллагаанд мөрдөгдөх тусгай дэглэм, журмыг хилийн боомтын зөвлөлийн дарга батлан мөрдүүлж, нэгдсэн удирдлагаар хангаж ажиллана.

9.10.Улсын хил хамгаалах байгууллага нь хилийн боомтоор зорчигчийг улсын хилээр нэвтрүүлэхдээ баримт бичгийг хялбаршуулсан журмаар шалгах бөгөөд холбогдох журмыг Улсын хил хамгаалах байгууллагын дарга батална.

9.11.Шүүгч, прокурорыг 24 цагаар ажиллуулах журмыг Улсын Дээд шүүхийн ерөнхий шүүгч болон Улсын ерөнхий прокурор тус тус баталж, хэрэгжилтийг нь зохион байгуулна.

9.12.Үндсэн хуулийн цэцэд маргаан хянан шийдвэрлэх болон бусад эрх бүхий байгууллагын хэрэг хянан шийдвэрлэх ажиллагаа, шүүхийн шийдвэр гүйцэтгэх зарим ажиллагааг цахимаар явуулж болох бөгөөд иргэний үндсэн эрх, эрх чөлөөний баталгааг дордуулахгүйгээр өөрийн бүрэн эрхийн хүрээнд холбогдох журмыг баталж, хэрэгжилтийг зохион байгуулна.

9.13.Олон улсын шуудан солилцооны үйлчилгээг тасралтгүй, шуурхай байдлыг хангаж, хил, гаалиар түргэвчилсэн горимоор нэвтрүүлэх журмыг гаалийн асуудал эрхэлсэн болон харилцаа холбооны асуудал эрхэлсэн Засгийн газрын гишүүд хамтран батална.

9.14.Харилцаа холбооны зохицуулах хороо нь цар тахлын үед болзошгүй эрсдлээс урьдчилан сэргийлэх, түүнтэй тэмцэх, олон нийтийг төөрөгдүүлэх мэдээ мэдээллийг таслан зогсоох зорилгоор цахим хуудас болон олон нийтийн сүлжээний хандалтыг түр хязгаарлах, тархалтыг бууруулах арга хэмжээг эрх бүхий байгууллагын саналыг үндэслэн нэн даруй авна.

9.15.Үүрэн холбооны болон интернетийн үйлчилгээ эрхлэгч нь холбогдох эрх бүхий байгууллагын хүсэлтийн дагуу зөрчил гаргасан цахим хуудас болон тухайн мэдээ, мэдээллийг өөрийн сүлжээнд хаах, шаардлагатай холбогдох мэдээллийг саадгүй гарган өгөх үүрэг хүлээнэ.

9.16.Төөрөгдүүлэх, худал мэдээлэл цахим орчинд тархахаас сэргийлэх зорилгоор цахим орчинд зохицуулалт хийх журмыг Цагдаагийн төв байгууллага, Харилцаа холбооны зохицуулах хороотой хамтран баталж, хэрэгжилтэд хяналт тавьж ажиллана.

9.17.Хөл хорио, хөдөлгөөний хязгаарлалт тогтоосны улмаас Монгол Улсаас гарах боломжгүй болсон нь холбогдох баримтаар тогтоогдсон гадаадын иргэн, харьяалалгүй хүний визийн болон Монгол Улсад оршин суух хугацааг тухайн нөхцөл байдал арилах хүртэл хугацаагаар сунгах, хүмүүнлэгийн үүднээс хугацаа хэтрүүлсний төлбөр, торгуулиас чөлөөлөх асуудлыг харьяалах улстай нь харилцан адил байх зарчмыг баримтлан шийдвэрлэнэ.

9.18.Энэ хуулийн 7.1.2-т заасан төсөв зохицуулалтын саналыг санхүү, төсвийн асуудал эрхэлсэн төрийн захиргааны төв байгууллага боловсруулж, Засгийн газрын хуралдаанаар хэлэлцүүлж шийдвэрлүүлнэ.

## **10 дугаар зүйл.Төв банкны бүрэн эрх**

10.1.Төв банк цар тахлаас урьдчилан сэргийлэх, хамгаалах асуудлаар зайлшгүй тохиолдолд дараах бүрэн эрхийг хэрэгжүүлнэ:

10.1.1.эдийн засгийн тодорхой салбарт чиглэсэн төгрөгийн болон банк санхүүгийн тогтолцооны тогтвортой байдлыг хангах зорилгоор Төв банкны тухай хуулийн<sup>8</sup> 11 дүгээр зүйлд заасан арга, хэрэгслийг ашиглах;

10.1.2.гадаад валютын нөөцийг нэмэгдүүлэх, зохицуулах зорилгоор дотоод болон гадаадын улс, олон улсын банк санхүүгийн байгууллага, хуулийн этгээдээс зээл болон бусад хэлцлээр гадаад валют авах, гадаад валют худалдан авах нөхцөлтэйгээр тус улсын банк, санхүүгийн байгууллагад зээл олгох.

## **11 дүгээр зүйл.Эрх бүхий байгууллага, албан тушаалтны шийдвэр, арга хэмжээнд тавих шаардлага**

11.1.Цар тахлаас урьдчилан сэргийлэх, тэмцэх асуудлаар эрх бүхий байгууллага, албан тушаалтнаас гаргах аливаа шийдвэр, арга хэмжээ нь Монгол Улсын Үндсэн хуулиар хамгаалсан иргэний үндсэн эрх, эрх чөлөөг хязгаарлах тохиолдолд доор дурдсан шаардлагыг нэг мөр хангана:

11.1.1.хуульд заасан үндэслэл журмын дагуу гарсан байх;

11.1.2.үндэсний аюулгүй байдал, нийгмийн хэв журам, нийтийн ёс суртахуун, нийгмийн эрүүл мэнд, эсхүл хүний бусад үндсэн эрх, эрх чөлөөг хамгаалах зорилготой байх;

11.1.3.энэ хуулийн 11.1.2-т заасан зорилгод хүрэхэд зайлшгүй, тохирсон байх;

11.1.4.хүний амьд явах эрх, итгэл үнэмшилтэй байх, шашин шүтэх, эс шүтэх эрх чөлөө, хэнд боловч эрүү шүүлт тулгах, хүнлэг бус, хэрцгий хандахыг хориглосон Монгол Улсын Үндсэн хуулийн заалтыг хөндөөгүй байх;

11.1.5.хүнийг үндэс, угсаа, хэл, арьсны өнгө, нас хүйс, нийгмийн гарал, байдал, хөрөнгө чинээ, эрхэлсэн ажил, албан тушаал, шашин шүтлэг, үзэл бодол, боловсрол болон бусад шинжээр нь ялгаварлан гадуурхахгүй, нэр төрийг нь доромжлохгүй байх.

---

<sup>8</sup> Төв банк /Монголбанк/-ны тухай хууль "Төрийн мэдээлэл" эмхэтгэлийн 1996 оны 11 дугаарт нийтлэгдсэн.



11.2.Энэ хуульд заасан арга хэмжээ нь тухайн нөхцөлд тохирсон тодорхой хамрах хүрээ, хугацаатай байх бөгөөд цугларсан мэдээллийг нийгмийн эрүүл мэндийг хамгаалахаас бусад зорилгоор урвуулан ашиглахыг хориглоно.

11.3.Цар тахлаас урьдчилан сэргийлэх, нийгмийн эрүүл мэндийг хамгаалах зорилгоор гарах шийдвэр, арга хэмжээ нь иргэний үндсэн эрх, эрх чөлөөг хамгийн бага хязгаарласан, бодитой, тохирсон байна.

11.4.Энэ хуулийн 11.1-д заасан шийдвэр, арга хэмжээний талаар хэвлэл мэдээллийн хэрэгслээр олон нийтэд тогтмол, шуурхай, хүртээмжтэй, дэлгэрэнгүй мэдээлнэ.

11.5.Хүний эрхийн үндэсний комисс нь Монгол Улсын Хүний эрхийн Үндэсний Комиссын тухай хуульд<sup>9</sup> заасан чиг үүрэг, бүрэн эрхийн хүрээнд энэ хуульд заасан арга хэмжээнд хяналт тавина.

## **ГУРАВДУГААР БҮЛЭГ ИРГЭН, ХУУЛИЙН ЭТГЭЭДИЙН ЭРХ, ҮҮРЭГ**

### **12 дугаар зүйл.Иргэний эрх, үүрэг**

12.1.Иргэн цар тахлаас урьдчилан сэргийлэх, тэмцэх талаар дараах эрхийг эдэлнэ:

12.1.1.холбогдох байгууллага, албан тушаалтнаас хэрэгжүүлж байгаа арга хэмжээний талаар үнэн зөв, бодит мэдээлэл авах;

12.1.2.цар тахалд өртсөн болон өртөж болзошгүй тохиолдолд шаардлагатай эрүүл мэндийн тусламж, үйлчилгээ авах;

12.1.3.цар тахлаас урьдчилан сэргийлэх, тэмцэх асуудлаар гаргасан шийдвэр, арга хэмжээ нь энэ хуулийн 11.1-д заасан шаардлагыг хангаагүйгээс эрх, эрх чөлөө нь зөрчигдсөн гэж үзвэл шүүхэд гомдол гаргах;

12.1.4.хуульд заасан бусад эрх.

12.2.Иргэн цар тахлаас урьдчилан сэргийлэх, тэмцэх талаар дараах үүрэгтэй:

12.2.1.эрх бүхий байгууллагаас баталсан шийдвэр, хорио цээр, хөдөлгөөний болон цагийн хязгаарлалтын дэглэм, заавар, журам, шаардлага, сэрэмжлүүлэг, анхааруулга, зөвлөмжийг сахин биелүүлэх;

12.2.2.өөрийн эрүүл мэндийн байдал, аяллын түүх зэрэг халдвар судлалд шаардлагатай мэдээллийг үнэн зөв өгөх;

12.2.3.мэргэжлийн байгууллагын зөвлөмжийн дагуу үзлэг, шинжилгээнд заавал хамрагдах;

---

<sup>9</sup>Хүний эрхийн Үндэсний Комиссын тухай хууль “Төрийн мэдээлэл” эмхэтгэлийн 2020 оны 08 дугаарт нийтлэгдсэн.

12.2.4.халдварын сэжигтэй шинж тэмдэг илэрсэн тохиолдолд өөрийгөө тусгаарлан эмнэлгийн байгууллагад яаралтай мэдэгдэх;

12.2.5.албан байгууллага, олон нийтийн газарт амны хаалт тогтмол зүүх, гараа тогтмол угаах, өдөр тутмын эрүүл ахуйн болон аюулгүй байдлыг хангах;

12.2.6.халдварын үед тусгаарлах, ажиглах журмыг чанд сахих;

12.2.7.халдвар гарсан улсаас ирсэн, эсхүл халдвар авсан байж болзошгүй бол эрх бүхий байгууллагаас тогтоосон нөхцөл, хугацаанд тусгаарлалтын дэглэмд байх;

12.2.8.татан авалт, тусгаарлалт, эмчилгээ, үйлчилгээ, ариутгал, халдваргүйтгэл зэрэгтэй холбогдон гарах зайлшгүй зардлыг төлөх;

12.2.9.эрх бүхий байгууллагын шийдвэрийг зөрчсөний улмаас гарсан зардлыг хариуцах;

12.2.10.хуульд заасан бусад үүрэг.

12.3.Цар тахлаас урьдчилан сэргийлэх, тэмцэх өндөржүүлсэн болон бүх нийтийн бэлэн байдлын үед жагсаал цуглаан хийх, нэг дор олноор буюу 4-өөс дээш хүн цугларахыг хориглоно.

12.4.Цар тахал, өвчлөл, түүнээс урьдчилан сэргийлэх, тэмцэхтэй холбоотой олон нийтийг төөрөгдүүлэх, худал мэдээлэл түгээхийг хориглоно.

12.5.Иргэн цар тахлыг бусдад зориуд халдаасан бол Эрүүгийн хуульд<sup>10</sup> заасан хариуцлага хүлээлгэнэ.

### **13 дугаар зүйл.Аж ахуйн нэгж, байгууллагын эрх, үүрэг**

13.1.Аж ахуйн нэгж, байгууллага нь цар тахлын үед дараах эрхтэй:

13.1.1.цар тахлаас хамгаалах талаар авч хэрэгжүүлж байгаа арга хэмжээний талаар үнэн зөв, бодит мэдээлэл авах;

13.1.2.цар тахлын эсрэг мэргэжлийн байгууллагатай хамтран ажиллах, зөвлөгөө авах, хандив, тусламж өгөх;

13.1.3.цар тахлаас урьдчилан сэргийлэх, хамгаалах асуудлаар гаргасан шийдвэр, арга хэмжээ нь энэ хуулийн 11.1-д заасан шаардлагыг хангаагүйгээс эрх, эрх чөлөө нь зөрчигдсөн гэж үзвэл шүүхэд гомдол гаргах;

13.1.4.хуульд заасан бусад эрх.

13.2.Аж ахуйн нэгж, байгууллага нь цар тахлын үед дараах үүрэгтэй:

13.2.1.эрх бүхий байгууллагаас баталсан шийдвэр, хорио цээр, хөдөлгөөний болон цагийн хязгаарлалтын дэглэм, заавар, журам, шаардлага, сэрэмжлүүлэг, анхааруулга, зөвлөмжийг сахин биелүүлэх;

---

<sup>10</sup> Эрүүгийн хууль Төрийн мэдээлэл эмхэтгэлийн 2016 оны 07 дугаарт хэвлэгдсэн.

13.2.2.цар тахлаас урьдчилан сэргийлэх, тэмцэхэд шаардлагатай нөөцийг бүрдүүлэх;

13.2.3.ажлын байранд агааржуулалт, ариутгал, халдваргүйжүүлэлтийг тогтмол хийж ажиллах;

13.2.4.иргэн болон ажилтныг халдвараас сэргийлэх нөхцөлийг эрх бүхий байгууллагаас өгсөн заавар, зөвлөмжийн дагуу бүрдүүлэх;

13.2.5.ажилтны ажлын байрыг хэвээр хадгалах;

13.2.6.олон нийтийг хамарсан арга хэмжээ, уулзалт зохион байгуулахгүй байх;

13.2.7.үйл ажиллагаагаа мэдээлэл, технологи ашиглан цахимаар явуулах боломжийг бүрдүүлэх;

13.2.8.гамшгийн үед түрээсийн төлбөрийг нэмэх, бараа, үйлчилгээний үнийн хөөрөгдөл, зохиомол хомсдол үүсгэхгүй байх;

13.2.9.хуульд заасан бусад үүрэг.

13.3.Цар тахал, өвчлөл, түүнээс урьдчилан сэргийлэх, тэмцэхтэй холбоотой олон нийтийг төөрөгдүүлэх, худал мэдээлэл түгээхийг хориглоно.

#### **14 дүгээр зүйл.Хэвлэл мэдээллийн байгууллагын үүрэг**

14.1.Хэвлэл мэдээллийн байгууллага нь цар тахлаас урьдчилан сэргийлэх, тэмцэх талаар Улсын онцгой комисс болон бусад эрх бүхий байгууллагаас өгсөн сэрэмжлүүлэг, мэдээллийг олон нийтэд мэдээлэх үнэ төлбөргүй, саадгүйгээр мэдээлнэ.

14.2.Цар тахлын талаарх цаг үеийн болон цар тахлаас урьдчилан сэргийлэх, тэмцэхтэй холбоотой үнэн бодит, мэдээллийг баталгаатай эх сурвалжаас авч олон нийтэд хүргэнэ.

### **ДӨРӨВДҮГЭЭР БҮЛЭГ БУСАД ЗҮЙЛ**

#### **15 дугаар зүйл.Хандив**

15.1.Иргэн, аж ахуйн нэгж, байгууллага, олон улсын байгууллага, гадаад улс орноос өгч байгаа хандивыг Улсын онцгой комисс бүртгэж, зарцуулалтыг олон нийтэд ил тод байлгаж, нэн шаардлагатай, төсөв санхүү дутагдалтай арга хэмжээг санхүүжүүлэхэд зарцуулна.

15.2.Энэ хуулийн 15.1-д заасан хандивын тодорхой хэсгийг Засгийн газрын тусгай сангийн тухай хуулийн<sup>11</sup> 5 дугаар зүйлийн 5.3.17-д заасан санд төвлөрүүлж, цар тахалтай холбоотойгоор гадаадын улс орнуудаас тогтоосон хөл хорио, хилийн хязгаарлалтын улмаас эх орондоо буцах боломжгүй болсон, санхүүгийн хүндрэлд

---

<sup>11</sup>Засгийн газрын тусгай сангийн тухай хууль "Төрийн мэдээлэл" эмхэтгэлийн 2019 оны 48 дугаарт нийтлэгдсэн.

орсон иргэдээс тодорхой шалгуурыг хангасан зорилтот бүлэгт тусламж үзүүлж болно.

#### **16 дугаар зүйл.Эд хөрөнгийн дайчилгаа**

16.1.Цар тахлаас урьдчилан сэргийлэх, тэмцэх үйл ажиллагаанд иргэн, аж ахуйн нэгж, байгууллагын эзэмшлийн эд хөрөнгө, барилга байгууламжийг дайчлан авч болно.

16.2.Иргэн, аж ахуйн нэгж, байгууллагын эзэмшлийн эд хөрөнгө, барилга байгууламжийг дайчилсан тохиолдолд тухайн хөрөнгийн урсгал болон үйл ажиллагааны зардлын хэмжээгээр нөхөн олговор олгоно.

16.3.Иргэн, аж ахуйн нэгж, байгууллагын эзэмшлийн эд хөрөнгө, барилга байгууламжийг дайчлан гаргуулсан тохиолдолд нөхөн олговрыг тооцох, олгох журмыг Улсын онцгой комиссын санал болгосноор Засгийн газар батална.

16.4.Аймаг, нийслэлийн Засаг дарга нь тухайн аймаг, нийслэл дэх дайчилж болох барилга байгууламжийн жагсаалтыг гаргаж Улсын онцгой комисст хүргүүлнэ.

#### **17 дугаар зүйл.Хууль зөрчигчид хүлээлгэх хариуцлага**

17.1.Энэ хуулийг зөрчсөн иргэн, хуулийн этгээдэд Эрүүгийн хууль, эсхүл Зөрчлийн тухай хуульд<sup>12</sup> заасан хариуцлага хүлээлгэнэ.

17.2.Энэ хуулийг зөрчсөн албан тушаалтны үйлдэл нь гэмт хэргийн шинжгүй бол Төрийн албаны тухай хуульд<sup>13</sup> заасан хариуцлага хүлээлгэнэ.

#### **18 дугаар зүйл.Хуулийн үйлчлэх хугацаа**

18.1.Энэ хууль дараах тохиолдолд хүчингүй болно:

18.1.1.цар тахалын дэгдэлт өнгөрсөн талаар дэлхийн эрүүл мэндийн байгууллагаас зарласан бол тухайн өдрийн 00 цагт;

18.1.2.2020 оны 12 дугаар сарын 31-ний өдрөөс өмнө энэ хуулийн үйлчлэлийг сунгах тухай шийдвэрийг Улсын Их Хурал гаргаагүй;

18.1.3.Улсын Их Хурал энэ хуулийг хүчингүй болгох тухай шийдвэрлэсэн.

18.2.Энэ хуулийн 18.1.2-т заасан хугацааг Улсын Их Хурал зургаа хүртэл сараар нэг удаа сунгаж болно.

#### **19 дүгээр зүйл.Хууль хүчин төгөлдөр болох**

19.1.Энэ хуулийг баталсан өдрөөс эхлэн дагаж мөрдөнө.

Гарын үсэг

<sup>12</sup>Зөрчлийн тухай хууль “Төрийн мэдээлэл” эмхэтгэлийн 2017 оны 24 дугаарт нийтлэгдсэн.

<sup>13</sup> Төрийн албаны тухай хууль “Төрийн мэдээлэл” эмхэтгэлийн 2018 оны 01 дугаарт нийтлэгдсэн.

**МОНГОЛ УЛСЫН ХУУЛЬ**

2020 оны ... дугаар  
сарын ... -ны өдөр

Улаанбаатар  
хот

**ЭРҮҮГИЙН ХУУЛЬД НЭМЭЛТ, ӨӨРЧЛӨЛТ  
ОРУУЛАХ ТУХАЙ**

**1 дүгээр зүйл.** Эрүүгийн хуульд доор дурдсан агуулгатай дараах зүйл, хэсэг нэмсүгэй:

**1/15.6 дугаар зүйлийн 1 дэх хэсэг:**

“1. Бусдын амь нас, эрүүл мэндэд аюул учруулж болзошгүй халдварт өвчний үед эрх бүхий байгууллага, албан тушаалтнаас тогтоосон хорио цээр, хязгаарлалтын дэглэм, холбогдох бусад журам, заавар, шаардлага, сэрэмжлүүлэг, анхааруулгыг зориуд санаатайгаар зөрчиж халдварт өвчин тархах нөхцөл бүрдүүлсэн, эсхүл бусдад халдаасан бол хоёр мянга долоон зуун нэгжээс арван дөрвөн мянган нэгжтэй тэнцэх хэмжээний төгрөгөөр торгох, эсхүл зургаан сараас гурван жил хүртэл хугацаагаар зорчих эрхийг хязгаарлах, эсхүл зургаан сараас гурван жил хүртэл хугацаагаар хорих ял шийтгэнэ.”

**2/18.1 дүгээр зүйлийн 2 дахь хэсэг:**

“2. Гамшиг, аюулт үзэгдэл, халдварт өвчин, осол, аюул, нийгэмд үүссэн бусад эрсдэлийн үед үнийн хөөрөгдөл, бараа бүтээгдэхүүний зохиомол хомсдолыг бий болгосон бол таван мянга дөрвөн зуун нэгжээс хорин долоон мянган нэгжтэй тэнцэх хэмжээний төгрөгөөр торгох ял шийтгэнэ.”

**2 дугаар зүйл.** Эрүүгийн хуулийн 15.6 дугаар зүйлийн 1, 2 дахь хэсэг, 2.1, 2.2 дахь заалтын дугаарыг “2, 3 дахь хэсэг, 3.1, 3.2” гэж, 18.1 дүгээр зүйлийн 2 дахь хэсгийн дугаарыг “3” гэж тус тус өөрчилсүгэй.

**3 дугаар зүйл.** Энэ хуулийг Коронавируст халдвар /COVID-19/-ын цар тахлаас урьдчилан сэргийлэх, тэмцэх хууль хүчин төгөлдөр болсон өдрөөс эхлэн дагаж мөрдөнө.

Гарын үсэг

## МОНГОЛ УЛСЫН ХУУЛЬ

2020 оны ... дугаар  
сарын ... ны өдөр

Улаанбаатар  
хот

**ЗӨРЧЛИЙН ТУХАЙ ХУУЛЬД НЭМЭЛТ,  
ӨӨРЧЛӨЛТ ОРУУЛАХ ТУХАЙ**

**1 дүгээр зүйл.**Зөрчлийн тухай хуулийн 5.13 дугаар зүйлд доор дурдсан агуулгатай дараах хэсгүүд нэмсүгэй.

“2.Гамшиг, аюулт үзэгдэл, халдварт өвчин, осол, аюул, нийгэмд үүссэн бусад эрсдэлийн үед эрх бүхий байгууллагаас тогтоосон хорио цээр, хөдөлгөөний хязгаарлалт, тэдгээрийн дэглэм, бусад журам, заавар, шаардлага, сэрэмжлүүлэг, анхааруулгыг биелүүлээгүй, эсхүл зөрчсөн, саад учруулсан бол хүнийг таван зуун нэгжтэй тэнцэх хэмжээний төгрөгөөр торгох, долоогоос гуч хүртэл хугацаагаар баривчлах, хуулийн этгээдийг таван мянган нэгжтэй тэнцэх хэмжээний төгрөгөөр торгоно.

3. Гамшиг, аюулт үзэгдэл, халдварт өвчин, осол, аюул, нийгэмд үүссэн бусад эрсдэлийн үед хуульд заасан үүргээ биелүүлээгүй, эсхүл зөрчсөн, зайлсхийсэн бол хүнийг таван зуун нэгжтэй тэнцэх хэмжээний төгрөгөөр, хуулийн этгээдийг таван мянган нэгжтэй тэнцэх хэмжээний төгрөгөөр торгоно.

4.Гамшиг, аюулт үзэгдэл, халдварт өвчин, осол, аюул, нийгэмд үүссэн бусад эрсдэлийн үед эрх бүхий байгууллагаас өгсөн мэдээ, мэдээллийг үнэ төлбөргүйгээр, саадгүйгээр мэдээлэх үүргээ биелүүлээгүй бол хуулийн этгээдийг таван мянган нэгжтэй тэнцэх хэмжээний төгрөгөөр торгоно.”

**2 дугаар зүйл.**Зөрчлийн тухай хуулийн дараахь хэсгийг доор дурдсанаар өөрчлөн найруулсугай:

**1/5.13 дугаар зүйлийн 1 дэх хэсэг:**

“1.Гамшиг, аюулт үзэгдэл, халдварт өвчин, осол, аюул, нийгэмд үүссэн бусад эрсдэлийн үед энэ талаар олон нийтийг төөрөгдүүлэх, худал мэдээ, мэдээлэл түгээсэн бол хүнийг таван зуун нэгжтэй тэнцэх хэмжээний төгрөгөөр, хуулийн этгээдийг таван мянган нэгжтэй тэнцэх хэмжээний төгрөгөөр торгоно.”

**2/5.17 дугаар зүйлийн 1 дэх хэсэг:**

“1.Гамшиг, аюулт үзэгдэл, халдварт өвчин, осол, аюултай тэмцэх улсын аюулгүй байдал хангахтай холбогдсон хүн хүч, тээвэр, холбооны хэрэгсэл, барилга байгууламжийн дайчилгаанаас зайлсхийсэн, эсхүл саад учруулсан бол хүнийг тавин нэгжтэй тэнцэх хэмжээний төгрөгөөр, хуулийн этгээдийг таван зуун нэгжтэй тэнцэх хэмжээний төгрөгөөр торгоно.”

**3 дугаар зүйл.**Зөрчлийн тухай хуулийн 5.13 дугаар зүйлийн 2, 3, 4 дэх хэсгийн дугаарыг “5, 6, 7” гэж тус тус өөрчилсүгэй.

**4 дүгээр зүйл.**Энэ хуулийг Коронавируст халдвар /COVID-19/-ын цар тахлаас урьдчилан сэргийлэх, тэмцэх хууль хүчин төгөлдөр болсон өдрөөс эхлэн дагаж мөрдөнө.

Гарын үсэг

**МОНГОЛ УЛСЫН ХУУЛЬ**

2020 оны ... дугаар  
сарын ... ны өдөр

Улаанбаатар  
хот

**ЗӨРЧИЛ ШАЛГАН ШИЙДВЭРЛЭХ ТУХАЙ ХУУЛЬД  
НЭМЭЛТ ОРУУЛАХ ТУХАЙ**

**1 дүгээр зүйл.**Зөрчил шалган шийдвэрлэх тухай хуулийн 1.8 дугаар зүйлийн 7 дахь хэсэг, 9.1 дүгээр зүйлийн 1 дэх хэсгийн “5.8 дугаар зүйлийн 6 дахь хэсэг,” гэсний дараа “5.13 дугаар зүйлийн 2 дахь хэсэг,” гэж тус тус нэмсүгэй.

**2 дугаар зүйл.**Энэ хуулийг Коронавируст халдвар /COVID-19/-ын цар тахлаас урьдчилан сэргийлэх, тэмцэх хууль хүчин төгөлдөр болсон өдрөөс эхлэн дагаж мөрдөнө.

Гарын үсэг

**МОНГОЛ УЛСЫН ХУУЛЬ**

2020 оны ... дугаар  
сарын ... ны өдөр

Улаанбаатар  
хот

**ГАМШГААС ХАМГААЛАХ ТУХАЙ ХУУЛЬД  
НЭМЭЛТ, ӨӨРЧЛӨЛТ ОРУУЛАХ ТУХАЙ**

**1 дүгээр зүйл.**Гамшгаас хамгаалах тухай хуулийн 4 дүгээр зүйлд доор дурдсан агуулгатай 4.1.19, 4.1.20 дахь заалт нэмсүгэй:

“4.1.19.“хорио цээр” гэж гамшиг, хурдан хугацаанд сум, аймаг, улсын нутаг дэвсгэрийг бүхэлд нь хамарч хүн, мал, амьтныг өвчлүүлдэг, гарз хохирол ихтэй, онцгой аюулт халдварт өвчний тархалтаас сэргийлэх, түүнийг анхны голомтод нь барих, уг өвчний тархалтыг таслан зогсоож, голомтыг устгахад чиглэсэн, дэглэм бүхий, тодорхой хугацааны иж бүрэн арга хэмжээг;

4.1.20.“хөдөлгөөний хязгаарлалт” гэж гамшиг, халдварт өвчний тархалтыг таслан зогсоох, онцгой аюулт халдварт өвчний үед тогтоосон хорио цээрийг сахиулах зорилгоор халдварын голомт, улсын хэмжээнд болон тодорхой нутаг дэвсгэрийг хамруулан авч хэрэгжүүлэх, дэглэм бүхий, тодорхой хугацааны зохион байгуулалтын арга хэмжээг;”

**2 дугаар зүйл.**Гамшгаас хамгаалах тухай хуулийн 4.1.18 дахь заалтын дугаарыг “4.1.21” гэж өөрчилсүгэй.

**3 дугаар зүйл.**Энэ хуулийг Коронавируст халдвар /COVID-19/-ын цар тахлаас урьдчилан сэргийлэх, тэмцэх хууль хүчин төгөлдөр болсон өдрөөс эхлэн дагаж мөрдөнө.

Гарын үсэг



**МОНГОЛ УЛСЫН ХУУЛЬ**

20... оны ... дугаар  
сарын ... ны өдөр

Улаанбаатар  
хот

**ЭРҮҮЛ МЭНДИЙН ТУХАЙ ХУУЛЬД  
НЭМЭЛТ, ӨӨРЧЛӨЛТ ОРУУЛАХ ТУХАЙ**

**1 дүгээр зүйл.** Эрүүл мэндийн тухай хуулийн 20 дугаар зүйлд доор дурдсан агуулгатай 20.1.6 дахь заалтыг нэмсүгэй.

“20.1.6.халдварт өвчин тархахаас урьдчилан сэргийлэх, шалтгаан нөхцөлийг арилгуулах зорилгоор иргэн, хуулийн этгээдэд шаардлага, сэрэмжлүүлэг өгөх, биелэлтийг нь хангуулах;”

**2 дугаар зүйл.** Эрүүл мэндийн тухай хуулийн 20.1.6 дахь заалтын дугаарыг “20.1.7” гэж өөрчилсүгэй.

**3 дугаар зүйл.** Энэ хуулийг Коронавируст халдвар /COVID-19/-ын цар тахлаас урьдчилан сэргийлэх, тэмцэх хууль хүчин төгөлдөр болсон өдрөөс эхлэн дагаж мөрдөнө.

Гарын үсэг